

**Broj:07-02-7-20/1/08**  
**Mostar,14.01.2008. godine**

Na osnovu člana 12. stav (1) i člana 14. stav (1) Statuta Regulatorne komisije za električnu energiju u Federaciji Bosne i Hercegovine („Službene novine FBiH“ br. 13/04), člana 31. stav (2), člana 37. stav (5) i člana 53. stav (2) Poslovnika o radu Regulatorne komisije za električnu energiju u Federaciji Bosne i Hercegovine („Službene novine FBiH“ br. 59/04), te člana 36. stav (6), člana 46. stav (3), člana 48. stav (1) i člana 49. Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine („Službene novine FBiH“ br. 37/05) i Odluke o provođenju trećeg tarifnog postupka br. 07-02-7-03/1/08 od 10.01.2008. godine, rješavajući po Zahtjevu za sticanje statusa umješača koji je u FERK primljen 11.01.2008. godine pod brojem 07-02-7-06/1/08, podnosioca „Aluminij“ d.d. Mostar, Regulatorna komisija za električnu energiju u FBiH – FERK je, na II. redovnoj sjednici, održanoj u Mostaru dana 14.01.2008. godine, donijela sljedeći

## ZAKLJUČAK

- I. Odobrava se Zahtjev „Aluminij“ d.d. Mostar za sticanje statusa umješača u tarifnom postupku i to u postupku formalne rasprave po Zahtjevu za odobrenje tarifa za djelatnost snabdijevanja električnom energijom koji je u FERK primljen 04.01.2008. godine pod brojem 07-02-7/1/08, na kojoj će se raspravljati i o prijedlogu tarifnih stavova, podnosioca Javnog poduzeća „Elektroprivreda Hrvatske zajednice Herceg Bosne“ dioničko društvo Mostar.
- II. Umješaču iz tačke I. ovog zaključka dozvoljeno je učestvovati u postupku formalne rasprave, iznositi dokaze, primjedbe i argumente i pridržavati se postavljenih rokova. Voditelj postupka može ograničiti učestvovanje umješača, u slučajevima kada je to za dobrobit efikasnog vođenja rasprave. Umješač ima i druga prava i obaveze u skladu sa odredbama Poslovnika o radu FERK-a i Pravilnika o javnim raspravama i rješavanju zahtjeva i žalbi FERK-a.
- III. Ovaj zaključak je konačan i stupa na snagu danom donošenja, te se objavljuje se na oglasnoj tabli i web stranici FERK-a.

## Obrazloženje

Član 53. stav (2) Poslovnika o radu FERK-a propisuje da FERK može dodijeliti status umješača licu koje dokaže direktan interes za tarifni postupak, koji je različit općem javnom interesu, te da je umješaču omogućeno da učestvuje u postupku, svjedoči i zahtjeva informacije putem člana FERK-a ili voditelja postupka formalne rasprave. U skladu sa članom 46. stav (3) Pravilnika o javnim raspravama i rješavanju zahtjeva i žalbi FERK-a, kriterije za utvrđivanje prava i statusa umješača FERK određuje za svaki konkretan slučaj posebno, zavisno od okolnosti slučaja. Članom 48. stav (1) istog Pravilnika propisano je da

FERK o zahtjevu za priznanje statusa umješača odlučuje u roku od 15 dana od dana prijema zahtjeva u FERK. Članom 36. stav (6) i članom 49. istog Pravilnika propisan je način na koji umješač dostavlja svoje podneske i na koji je način ovlašten učestvovati u raspravi.

Odlukom FERK-a o provođenju trećeg tarifnog postupka br.07-02-7-03/1/08 od 10.01.2008. godine određeno je da status umješača u postupku formalne rasprave može steći pravno ili fizičko lice pod uslovom da podnese zahtjev za sticanje statusa umješača i da ispunjava kriterije: da ima direktan interes u ovom tarifnom postupku, a koji je različit od općeg javnog interesa i da raspolaže podacima i činjenicama od značaja za formalnu raspravu u ovom tarifnom postupku koji se vodi pred FERK-om. FERK je putem Obavještenja za javnost o podnesenom Zahtjevu za odobrenje tarifa za djelatnost snabdijevanja električnom energijom od strane Javnog poduzeća „Elektroprivreda Hrvatske zajednice Herceg Bosne“ dioničko društvo Mostar i održavanju formalne rasprave, objavljenog na web stranici i oglasnoj tabli FERK-a 10.01.2008. godine, odnosno u „Dnevnom listu“, „Dnevnom avazu“, „Večernjem listu“ i „Slobodnoj Dalmaciji“ 11.01.2008. godine, odredio da se zahtjev za sticanje statusa umješača može FERK-u podnijeti do 14.01.2008. godine do 14:00 sati.

Dana 11.01.2008. godine, „Aluminij“ d.d. Mostar podnio je Zahtjev za sticanje statusa umješača u postupku formalne rasprave u trećem tarifnom postupku, koji je u FERK primljen pod brojem 07-02-7-06/1/08, a kojim je podnosilac zatražio sticanje statusa umješača u trećem tarifnom postupku i to u postupku formalne rasprave po Zahtjevu za odobrenje tarifa za djelatnost snabdijevanja električnom energijom, na kojoj će se raspravljati i o prijedlogu tarifnih stavova, podnosioca Javnog poduzeća „Elektroprivreda Hrvatske zajednice Herceg Bosne“ dioničko društvo Mostar .

U zahtjevu za sticanje statusa umješača, podnosilac je naveo da ima izuzetno veliki interes za sticanje statusa umješača u postupku formalne rasprave pred FERK-om povodom trećeg tarifnog postupka, a po Zahtjevu za odobrenje tarifa podnesenim od JP „Elektroprivreda HZ HB“ d.d. Mostar, da je najveći kupac električne energije u Bosni i Hercegovini, te moli da mu se osigura status umješača, obzirom da ukupna cijena električne energije jako utiče na ukupno poslovanje „Aluminij“ d.d. Mostar i da smatra da kroz status umješača, na formalnoj raspravi pred FERK-om, može konstruktivno uticati na iznalaženje najpovoljnijeg rješenja.

Rješavajući po Zahtjevu za sticanje statusa umješača podnosioca u postupku formalne rasprave u trećem tarifnom postupku, utvrđeno je da po podacima kojima FERK raspolaže, podnosilac predstavlja najvećeg kupca električne energije u Federaciji Bosne i Hercegovine, da se podnosilac u dijelu svojih potreba snabdijeva kao tarifni kupac Javnog poduzeća „Elektroprivreda Hrvatske zajednice Herceg Bosne“ dioničko društvo Mostar, da je Rješenjem FERK-a broj 07-02-807-01/18/06 od 03.10.2006. godine podnosilac zahtjeva stekao status kvalifikovanog kupca električne energije, kao i da cijena električne energije direktno utiče na njegovo poslovanje.

FERK je kod razmatranja ovog Zahtjeva u obzir uzeo i Zaključak Vlade Federacije BiH sa 39. sjednice održane 19.12.2007. godine, V. broj: 949/2007, kojim je utvrđena obaveza elektroprivrednih društava iz Federacije BiH da kao balansno odgovorne strane,

svaka u okviru svojih nadležnosti u skladu sa važećim zakonima i propisima, aktima i odlukama regulatornih komisija za električnu energiju i aktima Nezavisnog operatora sistema kojima se uređuje tržište električne energije u Bosni i Hercegovini, osiguraju snabdijevanje svih nekvalifikovanih (tarifnih) kupaca/potrošača električne energije u Federaciji Bosne i Hercegovine, kojima su dužna osigurati snabdijevanje, uključujući i kvalifikovane kupce koji su se opredijelili da budu snabdijevani kao tarifni kupci. Istim Zaključkom određena su zaduženja za JP Elektroprivreda BiH d.d.- Sarajevo, JP „Elektroprivreda HZ HB“ d.d. Mostar i „Aluminij“ d.d. Mostar i to na način da se zadužuju JP Elektroprivreda BiH d.d.-Sarajevo i JP „Elektroprivreda HZ HB“ d.d. Mostar da za potrebe snabdijevanja kupaca u Federaciji BiH iz vlastitih kapaciteta zajednički osiguraju 35 MW (u bandu) nedostajuće električne energije za potrebe snabdijevanja kupaca na području djelovanja JP „Elektroprivreda HZ HB“ d.d. Mostar, na način da JP Elektroprivreda BiH d.d.- Sarajevo u okviru navedenih količina osigura prema JP „Elektroprivreda HZ HB“ d.d. Mostar komercijalnu isporuku vlastitih bilansnih viškova koji iznose 307,44 GWh. Dalje je Vlada Federacije BiH zadužila JP „Elektroprivreda HZ HB“ d.d. Mostar da za potrebe snabdijevanja kupaca u Federaciji BiH na tržištu električne energije osigura dio nedostajuće električne energije u iznosu od 41 MW (u bandu), odnosno 360,14 GWh za potrebe snabdijevanja kupaca na području svog djelovanja, dok je „Aluminij“ d.d. Mostar zadužen da u skladu sa zakonom i važećim propisima, aktima i odlukama regulatornih komisija za električnu energiju i aktima Nezavisnog operatora sistema kojima se uređuje tržište električne energije u Bosni i Hercegovini, za vlastite potrebe na tržištu električne energije osigura dio nedostajuće električne energije u iznosu od 40 MW (u bandu) odnosno 351,36 GWh.

Budući da je podnosilac dokazao postojanje direktnog interesa da učestvuje u trećem tarifnom postupku, u postupku formalne rasprave po podnesenom Zahtjevu za odobrenje tarifa za djelatnost snabdijevanje električnom energijom na kojoj će se raspravljati i o prijedlogu tarifnih stavova, podnosioca Javnog poduzeća “Elektroprivreda Hrvatske zajednice Herceg Bosne“ dioničko društvo Mostar, odlučeno je kao u dispozitivu ovog zaključka.

**PREDSJEDNIK FERK-a**  
**Risto Mandrapa s.r.**